



Dili, 21 fulan-maiu 2020

Komunikadu Imprensa

Esklaresimentu kona-ba transporte aéreu Díli – Darwin

Tuir notísia ida husi órgaun komunikasaun sosiál nasionál ida nian, no ninia diseminasaun iha rede sosiál sira, Ministériu Transportes no Komunikasoin informá katak, tuir akordu ne'ebé asina ona entre Governu no Airnorth, kompañia aérea ne'e hala'o, dezde loron 10 fulan-abríl tinan 2020, nia voo dala-tolu kada semana entre Díli no Darwin, atubele hatán ba restrisaun viajen ho eskala boot nian sira ne'ebé promulga tiha ona hodi hamenus propagasaun husi COVID-19, ne'ebé mak izola tiha Timor-Leste, sein konektividade globál ba movimentu merkadoria nian, abastesimentu médiku ka pasajeiru sira, iha situasaun emerjénsia nian.

Nune'e, akordu refere permite transporte husi abastesimentu médiku nian, emerjénsia médika no fornesimentu ba bein no servisu sira ne'ebé esensíal ba sidadaun hotu-hotu no empreza sira iha territóriu nasionál. Atu informa tan katak kualkér reseita ne'ebé kompañia aérea hetan liuhusi operasaun sira ne'e, to'o valór totál ne'ebé selu tuir akordu servisu aéreu ne'ebé asina ona, hodi hola kadeira pasajeiru nian sira ka hodi transporta merkadoria sira, Airnorth maka sei selu ba Governu Timor-Leste, hodi nune'e bele hamenus ona kustu totál operasaun nian. **REMATA**

